

## **PAULO ĜENA TORETORE FILIPI EKALESIARI ĜERI**

Filipi vaĝa-foforina guruĝari

Ekalesia doĝorona Filipi ai tu Paulo ema Silas ĝerina eĝorato, mo tu Paulo ĝena evanelia varivarina vaĝa-ruaruana eveiato taiminai (Apostolo 16).

Paulo na mai fefa tu Romai ediburato-ĝoi nuĝanai etoreato. Mai fefa tu laĝani 60 beiaĝo 61 fakanai ta etoreato, mo tu Iesu emaseto murinai.

Mai buka anina baregona tu “Iaku ema verere”, ema ĝena siri baregona tu karoa 4:4. Mai fefa nuĝanai “iaku” tu ĝutuma boiavi-ĝoitaĝorini: 1:4-6; 1:14-18; 1:25-26; 2:2; 2:14-16; 2:17-18; 2:25-29; 3:1-3; 4:4; 4:10-12; ema veĝabidadama, veuravini, nuĝa-sebona ema vetore-variĝo o vevaĝa-manau boĝo ĝitaiani tu iaku ĝenana etubu-raĝeni.

Mai fefa etoreato tu, 1) ekalesia doĝorona bene tanikiuri, ĝevarevare-viniato lorinai, ema bene vaĝa-ribari bevarivaririni; 2) bene launaĝiri, Keriso ĝena tuĝamaĝi beĝene tovtovoa, ĝeri tuĝamaĝi sebonai moĝo beĝene torea; 3) bene launaĝiri, taimi namori ai o rakavari ai beĝene iaku moĝo ema ĝeri vetarikaka Iesu Keriso ĝesi tu bene tanu asi bene iagaiaga.

Paulo na mai fefa tu maiĝesina eboioĝaiato:

1. Keriso tu ĝita ĝera maĝuri - karoa 1
2. Keriso tu ĝita ĝera tuĝamaĝi ai bene tanu - karoa 2
3. Keriso ĝenai matara bene tubukau - karoa 3
4. Keriso tu ĝita ĝera kokore korana - karoa 4

<sup>1</sup> Au Paulo ema Timoteo, Keriso Iesu ġena vetuġunaġi tauma, na ġomi Filipi ai Barau ġena tarimarima veaġari ma ġemi ekalesia guinea-iaġina tarimari ema vevaġa-kava tarimari ġesi atore-vinimini. Ġomi tu Keriso Iesu ġesi varau ġosebonato.

<sup>2</sup> Barau ġita Tamara ema ġera Vereġauka Iesu Keriso ġerina varevare-bara ema maino ġemi ai bene tanu.

*Paulo na Barau evaġa-namoato*

<sup>3</sup> Ġomi atuġamaġimini negari mabarari ai, ġegu Barau atanikiu-viniani.

<sup>4</sup> Ġegu ġauġau ai vanaġivanuġi ġomi mabarami iatami ai aġuriġurini ma iakugu ġesi,

<sup>5</sup> korana ġemi vevaġa-kava dabarari namori na ġovaġa-kavaguto Vari Namona varifiunai, Vari Namona ġoġabi-raġeato ġarona na beiaġoma mo inította.

<sup>6</sup> Ma ribagu maoro, Barau na mai ġauvei namona, nuġami ai evaġa-foforiato ġauveina tu, bevesiriġuni, beiaġoni mo, Keriso Iesu ġena ġenoġoi ġaronai vau bevaġa-kori ginikauani.

<sup>7</sup> Ġomi mabarami ġegu vemamiraġi na evaġa-moġoniani, ġomi tu au nuġagu ai roġo ġotanuni. Aba, dibura numai atanuni nuġanai, o Kota ġeseġaġini tarimari ġoirari ai Vari Namona aki-raġi-foforiani e gogobana aragani nuġanai maki, ġomi tu au nuġagu ai veġata. Korana ġomi mabarami maki Barau na ġena varevare-bara evinimito, au eviniguto kavana.

<sup>8</sup> Barau ma ribana vedaurea, au ġomi aki-ramini, au ġegu veuravini ġomi mabarami ġemi

ai tu barego vedaurea, Keriso Iesu na euravini-baregomini kavana.

<sup>9</sup> Barau anogiani, ġemi ai veuravini bene tubu-barego vedaurea, ma riba ema iaunega bene vinimi, be Barau ġena ura boġono riba-ginikauri.

<sup>10</sup> Monana vauro boġo ribani, dagara namori tu aiġeri na ġemi tanu beġe vaġa-namorini rakava mabarari ġerina, benamo Iesu Keriso ma beġenoġoi-iaġomani ġaronai, ġomi tu asi vetoukaumi e asi ġemi kerere ta maki.

<sup>11</sup> Ema veġa namori e iobukaiobukari mabarari, Iesu Keriso ġenana ġeiaġomani dagarari, ġomi ġemi ai beġe tanuni, Barau vevato-iaġina e vaġa-raġena ġana.

*Paulo tu dibura numai etanuni, senaġi Vari Namona ebaregoni*

<sup>12</sup> Tarikakagu, ġegu ura boġono riba, au beġe diburagu o kara beġe ġora ġegu ai dagarari na Vari Namona ġena tubu tu asi beġe vaġa-rakavaia. Asiġina. Moġeri na tu Vari Namona ġena tubu beġe vaġa-baregoa.

<sup>13</sup> Mai maġuri ġenana Kaisara, Roma ġeri vere, ġena numa ġeġita-ġauani tauri ema tarimarima mabarari maki beġe riba, au tu Iesu Keriso ġena vetuġunaġi aiāġo-vinini ġaramanai, dibura numai atanuni.

<sup>14</sup> Ma ġegu tanu dibura numai ġenana maki au tarikakagu ġutuma ġeri veġabidadama Vereġauka ġenai beġe gwaġiġi naima, Barau ġena guruġa ma kokoreri ġesi ġeġobata-iaġiani.

<sup>15</sup> Moḡoni, tarima kotari na ḡegu ḡauvei namo dainai, ḡemama-viniguni. Ġeri ura tu au ḡevaḡa-rakavagu ḡetoni, naima Keriso ḡeḡobata-iaḡiani. Senaḡi kotari na tu nuḡa-namo ai ḡeḡobata-iaḡiani.

<sup>16</sup> Maḡeri tu veuravini ḡenana ḡeḡobatani, korana ribari, au diburai atanuni tu, Vari Namona gogobana bana raga ḡana Kota tarimari ḡoirari ai.

<sup>17</sup> A tarima kotari na Keriso ḡeḡobata-iaḡiani tu dia nuḡa-namo ai, senaḡi tauḡeri arari beḡene vaḡa-raḡeri ḡana. Ġeri tuḡamaḡi tu, au dibura numanai roḡo atanuni nuḡanai, ḡegu meto ḡevaḡa-baregoa ḡetoni.

<sup>18</sup> Bevaitovo, au ḡegu iaku tu ebaregoni. Korana nuḡa-namo ai Keriso ḡeḡobata-iaḡiani ba asiḡina, senaḡi dagara baregona tu Keriso varina bene fiurovorovo dabara mabarari ai. Ma ḡegu iaku maki bebarego-iaḡoni moḡo.

<sup>19</sup> Korana ḡemi ḡauḡau ai Barau ḡonoḡiani ema Iesu Keriso Iaukana na evaḡa-kavaguni. Moḡa lorinai au ribagu, au tu maḡuri badoḡariani.

<sup>20</sup> Ġegu ura baregona ema dabaragu mabarana ḡesi akirani, au tu asiḡina ḡinavaḡi bana moira ḡegu ḡauvei nuḡanai. Moḡesi nai initoma dibura numai vanaḡivanāḡi akokoreni kavana bana kokore, be au taugu mabarana ḡesi Iesu Keriso arana ma bana vaḡa-raḡea ḡegu maḡuri ḡenana o ḡegu mase ḡenana.

<sup>21</sup> Be au ḡegu ai maḡuri tu kara? Iesu Keriso moḡo! Moḡa lorinai mase au ḡegu ai tu dagara namona.

<sup>22</sup> Betaḡu bema roḡo bamaḡuri-taḡoni nai, ribagu Keriso ḡena ḡauvei roḡo haveiani, senaḡi asi

aribani, aiġa bara ġabia, mase ba maġuri?

<sup>23</sup> Au tu dagara ruarua auravini-baregorini: Ġegu ura mai maġuri bara raga-kwanea, be Keriso sevinai bara tanu tu dagara namo vedau-reana moġo;

<sup>24</sup> senaġi namona tu ġomi bana vaġa-kavami ġana, be mai tauġani nuġanai roġo bana tanu.

<sup>25</sup> Au tu ribagu, au roġo maġuri batanuni. Ġomi ġesi roġo bita tanuni, korana ġemi veġabidadama vaġa-tuburi ema ġemi iaku vaġa-baregori ġana.

<sup>26</sup> Au ma baiaġosini neganai, ġomi tu boġo iakuni au ġegu ai, ema Keriso Iesu boġo vaġa-raġeani.

### *Ġemi tanu*

<sup>27</sup> Dagara sebona tu Keriso ġena Vari Namona na ekiraġiani ilailanai boġono tanu. Baiaġosini ġitaġitami ba manaġa na moġo varimi baseġaġini, baribani, ġomi tu nuġa-namo ai ġoritoġo-gigitarini ema nuġa sebonai Vari Namona ġoveseġaġi-vevini-iaġiani ma kokoremi ġesi.

<sup>28</sup> Ġebaru-vinimini tarimari na asiġina ġinavaġi beġene vaġa-garimi. Monana ġeri ai vetoġa beveiani, ġia tu Barau na bevaġa-rakava kwaik-wairini, a ġomi tu Barau na bevaġa-maġurimini.

<sup>29</sup> Ġomi tu dia Keriso ġena varevare-bara e namo lorinai Keriso ġovaġa-moġoniani tarimami ai ġoiaġoto moġo, senaġi ġomi tu Keriso ġena midigumidigu ai maki boġono midigu ġana ġia aranai.

<sup>30</sup> Ġomi maki initoma au ġesi bisini vetari-vegogo. Mai vetari tu vetari guinena ġoġitaiato-

ġoi vetarina ini roġo ma ġoseġaġiani vetarina roġo avetari-iaġiani.

## 2

*Keriso ġena vevaġa-manau ema iaru-korokoro*

<sup>1</sup> Ġemi maġuri Keriso nuġanai monana evaġa-kokoremini ba? Ema ġena veuravini na ġemi tuġamaġi evaġa-gwaġiġirini ba? Ġomi na Iauka Veaġa ġatami ai ġovaġa-iaġoato ma ġotanu-vegogoni ba? Ma ġemi vevetuġaġwa ema vevaġa-kava ġatami tata ġeri ai ġoveirini ba?

<sup>2</sup> Moġa lorinai anoġimini, boġono vaġa-iaku korikorigu, ġemi tuġamaġi vegogo ai, veuravini sebonai ema nuġami e iaukami maki sebonai boġono tanu.

<sup>3</sup> Dagara ta asi boġono veia vevaġa-raġe tuġamaġina maġurina ema veiavi maġuriri ai, senaġi ġomi tauġemi boġono vevaġa-variġo tata fakami ai, a karomi boġono ġabi-ġesitaġori.

<sup>4</sup> Karomi ġeri namo maki boġono vetau, a dia ġomi tauġemi ġereġami ġemi namo moġo.

<sup>5</sup> Ġemi veiġai Keriso Iesu kavana boġono vej, ġena tuġamaġi boġono ġabia:

<sup>6</sup> Ġia tu dagara mabarari ai  
Barau ġesi ilaila,  
senaġi asi etuġamaġito,  
mo maġuri moġa bene ġabi-taria.

<sup>7</sup> Ġia tu tauġena evekiraġi-fitoġato,  
benamo vetuġunaġi merona kavanai eiaġoto.  
Ġia maki tarimarima kavana eġorato,  
benamo ġita fakarai ema tanuto.

8 Ģia tu eveģwa-variģoto ema Barau eseģaģi-viniato-ģoi mo ģena mase, aba, satauro ai emaseto noģa moģo vei-rakava tarimana ta kavana.

9 Moģa lorinai Barau na eģabi-vaisiato guba tuģunai,

ma ara namo vedaureana eviniato.

Mo ara tu ara ta ģesi asi ilaila.

10 Iesu arana bakunai guba aneruri,

e tanobarai ģetanuni tarimari,

ema tanobara gaburenai o mase gabunai ģetanuni tarimari mabarari beģene vetuitui-tari ģia ģoiranai.

11 Ema mea mabarari na Iesu Keriso beģene kiraģia "Vereģauka",

Barau ģita Tamara vevato-iaģina ģana.

*Bitana mama-rovorovo tanobara ģena mama*

12 Au ģatagu mabarami, vanaģivanagi au ģoseģaģi-viniguto-ģoi ģera ģauvei vegogo ai kavana murigu ai maki boģono seģaģi-vinigu veģata. Boģono ģauvei ma garimi ema ma ģoģo-ģoģomi ģesi, maģuri boģono doģaria uranai.

13 Korana Barau tu ģomi nuģami ai eģauveini, ģomi elaunaģimini e kokore evinimini, ģena ura boģono veiri ģana.

14 Ģauvei mabarari asi mugumugumi ema asi vanevanemi ģesi boģono ģauvei-iaģiri.

15 Be ģomi tu Barau natuna asi vetoukaumi ema namo vedaureami ai boģono iaģo, mai tanobara rakava kwaikwai ema ģevei-rakava-moģovaģini tarimari fakari ai; be boģono mama-rovorovo, noģa moģo visiģu boģi ai ģemamani kavana.

16 Mo tu bema maḡuri guruḡana boḡo korana-iaḡiani e boḡo vari-fuani nai. Moḡa boḡo veiani nai, au tu ma ḡegu maoro havekokorokuni ḡomi ḡemi ai Keriso ma beḡenoḡoi-iaḡomani ḡaronai. Korana mo ḡaro ai au tu baribani, au ḡegu vekwaraḡi ema ḡauvei ai tu asi avekwaraḡi-kavato.

17 Bere au bara mase, ma raragu bere vebuburovorovo, noḡa moḡo ḡomi ḡemi veḡabidadama varevarena Barau ḡoviniani kavana. Irau moḡesi nai, au tu aiakuni, ema ḡegu verere maki ḡomi ḡesi tavei-sebonaiani.

18 Mai dabara sebonai ḡomi maki boḡono verere, be mabarara bitana verere-vegogo.

### *Timoteo batuḡu-iaḡosiani*

19 Bema Iesu Vereḡauka ḡena ura nai tu, atuḡamaḡini, Timoteo tu batuḡu-iaḡosiani; be ḡomi varimi banama seḡaḡia nai, au nuḡagu benema gena-tari.

20 Timoteo ḡereḡana na moḡo au ḡegu vemami-raḡi eribaiani, ema ḡomi ḡobimi vetuḡamaḡina evei-baregoni.

21 Tarimarima mabarari tu tauḡeri ḡeri maḡuri moḡo loriri ḡetorerini, a Iesu Keriso ḡena ḡauvei tu asi ḡevetauani.

22 Ḡomi tu ribami ginikau, ḡia vetoḡana ema ḡena vetuḡamaḡikau, kamasi ḡia e au, noḡa tama ma natuna ḡeḡauvei-vegogoni kavana, Vari Namona ḡaḡobata-iaḡiani.

23 Moḡa lorinai bana tuḡu-iaḡosi-ḡarimoḡia, maḡuri mainai kamasi bevetoreni ḡegu ai bana riba vau.



24 A ġegu vetuġamaġikau Vereġauka ġenai atore-  
ani, au maki vau mani ma baiaġosini ġemi ai.

### *Epafrodito ġena iaġosi*

25 Ġegu tuġamaġi ai akirani, namona tu  
tarikakara Epafrodito ma bana tuġu-ġenoġoi-  
iaġosia. Ġia maki au ġesi ġaġauveito e Keriso  
ġena vetari ai ġavetari-vegogoto tauna. Ġomi  
maki vetuġunaġimi eveito, au ġegu ai ġotuġuato  
nai, ġemi varevare dagarari na bene vaġa-kavagu  
ġana.

26 Ġia maki eura-baregoni ġomi bene ġitami.  
Ema enuġa-vekwaraġini ġemi ai, korana ġena keve  
varina ġoseġaġiato nai.

27 Moġoni veġata, ġia tu ekeve-rakavato, dori  
emaseto, senaġi Barau ġena vevetuġaġwa ġia  
iatanai, ema dia ġia iatanai moġo, senaġi au  
iatagu ai maki, korana ġegu nuġa-meto bebare-  
goni garina.

28 Moġa lorinai ġegu ura baregona bana ra-  
gatuġu-iaġosia ġemi ai, be boġono ġitaia ma  
boġono iaku, benamo au ġegu nuġa-vekwaraġi  
bene meraġa kekei.

29 Boġono ġabi-raġea ma iakumi ġesi ġera  
Vereġauka aranai, ema ġemi vegubakau mare-  
vana bene fofori tarima maġesiri ġeri ai.

30 Korana ġena maġuri ġaramana asi eveito,  
ema dori emaseto, korana Keriso Varina Namona  
ġaramanai. Vetoġa maġesina ġegu vevaġa-kava  
ġomi na ġoro vinigu kavana tu ġia na au ema  
vaġa-kavaguto.

### 3

*Keriso evaḡa-moḡoniani tauna tu vei-iobukaiobuka tarimana*

<sup>1</sup> Tarikakagu mabarami, ḡegu guruḡa magona nuḡanai maiḡesi nakira: Boḡono iaku, korana Vereḡauka ḡesi ḡokaro-vekafani nai. Asi bagauni, guruḡa guineri batuḡu-ḡenoḡoi ḡenoḡoini, korana ḡomi ḡobimi toretoreri ḡana.

<sup>2</sup> Lorimi boḡono vetore ekalesia vaḡa-rakavana tauri gariri. Ġia tu kwaiva rakavari kavana, ḡeri tuḡamaḡi tu ḡita mabarara tauḡanira kefiri bitana lama-vaḡiri ḡetoni, Isaraela besena ḡeveini kavana.

<sup>3</sup> Senaḡi tauḡani kefiri lamavaḡi veiḡana korikorina tu ḡita na taḡabiato, a ḡia tu asiḡi: Ġita tu Iauka Veaḡa ḡena seḡukai Barau tatutuḡutari viniani, ema Keriso Iesu ḡenai tavetuḡamaḡikauni, ema ḡera veḡabidadama tu dia tauḡani ai vetoḡa ḡeveini moḡeri ai tatoreani.

<sup>4</sup> Bere tauḡani ḡena vetoḡa ema ḡera veiḡa dagara baregori nai, ḡegu veḡabidadama tu tauḡani ḡena vetoḡa dagarari ema ḡegu veiḡa ḡeri ai bara torea riba. Bema ta ḡena veḡabidadama tauḡanina ḡena vetoḡa dagarari ema ḡena veiḡa ḡeri ai bene torea etoni nai, au tu ma ḡegu maoro moḡeri dagarai bara veḡabidadama.

<sup>5</sup> Amaḡurito, ḡaro vaḡa-imaima toitoinei (8) tauḡanigu kefina ḡelama-vaḡiatio. Au tu Isaraela tarimagu, Beniamina ḡena doḡoro tarimagu, Heberu rarari tarimagu korikori. Iuda tarimari ḡeri taravatu akorana-iaḡi ginikauato-ḡoi, korana au tu Farisea tarimagu.

6 Barau ġena taravatu bana korana-iaġi ginikaua ġaramanai tu, ekalesia doġorona avaġa-midigu midigurito. Ema Iuda ġeri taravatu mabarabarari akorana-iaġi ginikau ginikaurito-ġoi, asi ġegu vei-rakava ta.

7 Moġeri dagara mabarari guinenai tu atuġamaġi-baregorito-ġoi; senaġi initoma Keriso ama ribaiato nai, mo dagara guineri mabarari aġitarini tu asi ġeri namo ta maki.

8 Moġoni veġata, dagara mabarari tu asi tauri dagarari, senaġi dagara baregona sebona moġo tu Keriso Iesu, ġegu Vereġauka, bana riba-ginikaua. Oba, dagara mabarari momo ai ġeiaġoto au ġegu ai, Keriso moġo bana ġabi-gigitaria ġana uranai.

9 Ġegu ura ġia ġesi bana sebona-korikori, korana ribagu, taravatu ekorana-iaġi ginikauani tarimana Barau ġoiranai ġia tu dia vei-iobukaiobuka tarimana, senaġi Keriso evaġa-moġoniani tarimana moġo; korana Barau na vei-iobukaiobuka tarimarai bekiraġirani dabarana sebona tu veġabidadama ġenana moġo.

10 Ġegu ura baregona tu Keriso bana riba-ginikaua, ema mase na evaġa-vaisi-raġeato seġukana bana ġabia; ema emidiguto midiguna maki bana mami-tovoa, ma ġia ġena mase kavanai au maki bana mase.

11 Mainana vau atuġamaġini, au maki mase na bavaisiraġe-ġenoġoini.

12 Au asi akirani, moġeri mabarari varau aġabirito, o varau anamo-vedaureato, asiġina. Senaġi au tu avekwarraġi-rakavani, auna bana ġabia ġana, korana Keriso Iesu ġena kwalimu ai

au maki eġabiguto ġia ġena.

<sup>13</sup> Moġoni, tarikakagu, asi akirani varau akwal-imuto atoni, asiġina. Dagara sebna moġo tu, maġuri guineri atuġarekwarito, ma ġoiragu dagarana bana ġoitagoa kokorena moġo avetauani.

<sup>14</sup> Initoma tu araga-maoromaoroni, kiraġitore makana aiaġo-viniani, mo kwalimu voina bana ġabia uranai, dagarana tu Barau ġena maġuri gubai. Korana Barau na Keriso Iesu ġenana ekeaguto, mo maġuri bana ġabia ġana.

<sup>15</sup> Ġita ġera veġabidadamai taruġa-gwaġiġito taura tu maiġesi bisini tuġamaġi-vegogo. A ġomi betaġu dagara tari ai ġemi tuġamaġi tu irau nai, Barau na vau tuġamaġi-faka bene vinimi.

<sup>16</sup> Dagara sebna, iauka maġuriri namori ġita na varau taġabirito moġeri bitana ġabi-gigitariri.

<sup>17</sup> Tarikakagu mabarami, au boġono tovo-tovogu. Veġa namo ġeveini tarimari boġono marereri e boġono tovo-tovori maki, vevaġa-ġita namori avaġa-ġitamini kavana.

<sup>18</sup> Korana varau avaġa-guruġa ġenoġoi-ġenoġoimito-ġoi, senaġi ini tu ma avaġa-guruġamini ma taġigu ġesi: Ġutuma ġekirani, Keriso murinai ġerakani ġetoni, senaġi ġeġofaġofani, Iesu Keriso ġena satauro ġevetari-viniani.

<sup>19</sup> Ġia varau rakava gabuna ġana ġeiaġoni, korana ġeri barau tu ġia tauġaniri na ġeiku-iaġirini dagarari. Ġeri veġa rakavari, ġere maiaka-iaġiri veġari, ġeveiavi-iaġirini. Ema mai tanobara dagarari moġo ġetuġamaġi-gigitaririni.

<sup>20</sup> A ġita tu Guba Basileia tarimara. Moġa

lorinai ġera vevaġa-maġuri tauna, ġera Vereġauka Iesu Keriso ma iakura ġesi tanariani, guba tuġuna na beiaġomani.

<sup>21</sup> Ġia na ġita mai tauġanira moiramoirari maiġeri bekurevorini, benamo ġia tauġanina namo vedaureana kavanai beġe iaġoni. Korana ġia seġukana na dagara mabarari ġia ġena veġitaġau gaburenai beġe tanuni.

## 4

### *Sisiba guruġari tari*

<sup>1</sup> Tauna moġa, tarikakagu, Vereġauka ġena maġuri nuġanai boġono ruġa-gwaġiġi. Au na auravini-baregomini ema bana ġitami veġata atoni, korana ġomi tu au ġegu verere korana e ġegu kwalimu vetoġana.

<sup>2</sup> Euodia ema Sintike, anoġimini, nuġami beġene sebna, korana ġomi tu Vereġauka ġena doġoro vavinemi.

<sup>3</sup> Ġoi maki, Sisigo, au karogu namona, anoġimuni, mani vavine kika bono vaġa-kavari, ġia maki au ġesi ġaġauvei-vegogoto-ġoi Vari Namona fiufiunai, e Klement ema ġita karora tari maki. Ġia arari tu Barau ġena maġuri vanaġivanāġi bukanai varau etorerito.

<sup>4</sup> Vereġauka ġena maġuri nuġanai ġaro mabarari ai boġono iaku. Ma nakira: Boġono iaku.

<sup>5</sup> Ġemi manau e nuġa-marana boġono vevaġa-ġita-iaġiri tarimarima ġeri ai. Korana Vereġauka ġena iaġoma bekavināġi-rakava.

6 Dagara ta tuḡamaḡi-vekwaragina asi boḡono vei, senaḡi vanaḡivanaḡi ḡemi rabu dagarari ḡauḡau ai Barau boḡono noḡia ma tanikiumi ḡesi.

7 Benamo Barau na ḡena maino, ḡita mabarara ḡera riba e tuḡamaḡi-faka evanaḡiato mainona, bevinimini, ma mo maino na ḡomi lorumi ema ḡemi tuḡamaḡi mabarari benari-ginikaurini, Keriso Iesu ḡena maḡuri nuḡanai ḡotanuni dainai.

8 Tarikakagu mabarami, ḡegu toretore magona rekenai nakira, vanaḡivanaḡi veiḡa maiḡesi kavari boḡono tuḡamaḡi-iaḡiri: Maḡuri moḡoniri, dagara marevana irau veḡata, vei-iobukaiobuka, veiḡa namo vedaureari, veuravini veiḡari, ema vegubakau maḡuriri. Dagara namori ema tari-marima na ḡevaḡa-raḡerini veiḡari mabarari boḡono tuḡamaḡi-iaḡiri.

9 Ḗegu ḡobata na ḡoribarito guruḡari ema ḡegu veiḡa na ḡodoḡaririto veiḡari mabarari ḡemi maḡuri ai boḡono ḡauvei-iaḡiri e boḡono korana-iaḡiri. Benamo maino evinirani Barauna ḡomi ḡemi ai bene tanu.

### *Filipi tarimari ḡeri vevaḡa-kava*

10 Ḗegu iaku tu asikei ema Vereḡauka avaga-namoani nuḡagu mabarana ḡesi, korana ḡemi vevaḡa-kava varevarena ma boḡo tuḡu-iaḡomaia nai. Au ribagu, asi ḡotuḡarekwaguni, ḡemi ura vanaḡivanaḡi boḡono vaḡa-kavagu, senaḡi gabu manaḡai atanuni nai, asi ḡemi dabara ta au vaḡa-kavagu.

11 Au tu dia dagara tai akubini naima maiḡesi aguruḡani. Asigina. Au tu ḡegu-ḡagu vovoka o asigina, senaḡi badukuani ilaila.

12 Au tu akubini vetoġana ma ribagu, ema ġegu-ġagu ġevovokani vetoġana maki ma ribagu, be taimi tai gabu tai maiġeri maġuri baraga-ġoitāġorini nai, aiġesina badukurini tu ribagu. Mai riba vekuretoġana tu varau aribaiato. Moġesina nai au tu beġe ġubu-maseguni o bevitoguni, ġegu-ġagu vovoka o bakubini au ġegu ai tu ilaila moġo.

13 Maġuri aiġesina ġegu ai evetoreni, senaġina asi ġegu daradara, korana Keriso na ġena seġuka eviniguni nai.

14 Senaġi aiakuni, korana ġemi vevaġa-kava barego mai ġegu meto nuġanai bama doġaria.

15 Ġomi Filipi tarimami tu ribami: Makedonia aiaġuiato, tovtovonai Vari Namona aġobata-iaġiato-ġoi nai, ekalesia doġorona ta na asi evaġa-kavaguto-ġoi ġeri moni e farefare na, ġomi moġo ġereġami.

16 Ġomi na vevaġa-kava dagarari vovoka ġotuġu-tuġukauto-ġoi au Tesalonika vanuġanai atanuto-ġoi nuġanai.

17 Au asi atuġamaġini, au ġomi ġemina vevaġa-kava dagarari bana doġari, senaġi ġegu ura baregona tu, ġomi ġemi ai ġemi vini auna bene barego bana ġitaia.

18 Au ġegu ai ġomi ġemi varevare dagarari ġotuġu-iaġomarito tu mabarari maiġeri, be ġegu-ġagu tu vovoka ema ilaila. Ribagu, aura-vinirini dagarari mabarari maiġeri Epafrodito na eġwa-iaġomarito ġegu ai. Ġemi varevare dagarari bonari irau veġata Barau na eġabi-raġerini ginitaġo varevareri, Barau ġevaġa-iakuani dagarari.

19 Ĝegu Barau na ĝena farefare namori ema vovoka tabutaburi Keriso Iesu ĝenana bevarevarevini ginikaumini ĝemi rabu ĝarori ai.

20 Tamara Barau bitana vaĝa-raĝea vanaĝivanaĝi, Amen.

*Vevaĝa-namo guruĝari*

21 Iesu Keriso ĝena tarimarima mabarari ĝeri vevaĝa-namo ĝeguna eiaĝosini. Ĝita tarikakara au ĝesi ĝatanuni na ĝemi vevaĝa-namo beĝe tuĝu.

22 Barau ĝena veaĝa tarimari mabarari ĝerina vevaĝa-namo beĝe tuĝu ĝemi, ema Kaisara, Roma ĝeri vere, ĝena numa tarimari na maki ĝemi vevaĝa-namo baregona beĝe tuĝua.

23 Vereĝauka Iesu Keriso ĝena namo ema varevare-bara ĝomi tata iatami ai bene tanu.



**GINITAŌ VARIŌUNA**  
**The New Testament in the Sinaugoro Language of**  
**Papua New Guinea**  
**Nupela Testamen long tokples Sinaugoro long Niugini**  
Copyright © 1995 The Bible Society of Papua New Guinea

Language: Sinaugoro

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 18 Apr 2025 from source files dated 31 Aug 2023  
a998e4ce-f2f7-5577-968e-5d2feef358f1